

Museo Antigüedad Aruba tambe merece un Monumento, den centro di nos ciudad Oranjestad

STA. CRUZ--Fundacion Juan Mario Odor tin actualmente dos (2) museo bao di nan maneho: Museo Numismatico Aruba y Museo Antigüedad Aruba. E fundacion aki tin su man yen cu un solo meta: exhibi coleccionnan di nan fundador Juan Mario Odor†. Como consecuencia e museonan a bira atraccionnan fuerte pa nos Isla chiquito. Bao di maneho dinamico di directora, Desiree Croes por ripara cu e museonan a bira hopi activo. Despues cu su abuelo Mario Odor a fayece na edad avanza, Desiree Croes a pone tur focus riba locual su abuelo a laga atras.

Cu pasonan firme y cu hopi voluntad el'a reorganiza Museo Numismatico Aruba cu a bira un 'landmark' pa Aruba pa loke ta trata Museo. Ademas Museo Numismatico Aruba no ta di interes nacional so pero hopi interes internacional, loke sigur ta bon pa Aruba su turismo. A bira tempo pa Aruba muestra su cara culto, cultural, artistico y mucho mas cu no ta solamente solo, beach y shop. Aruba no ta asina superficial, nos tin hopi mas pa ofrece pero no tin un estructura pa presenta esaki pa nos bishitantenan. Esaki ta e motibo pakico Fundacion Juan Mario Odor

a cuminsa stimula eventonan cultural na hotelnan y awor ta conta cu tur apoyo di Aruba Marriott Resort, AHATA, ATAY Aruba Cruise Tourism. Por sinti cu hotelnan awor ta ansioso pa trece mas eventonan cu profundidad pa nos bishitantenan y AWOR ta e ora. Nos no por warda mas pasobra ya caba number di Aruba ta lastra tur rond mundo den diferente luz. Nos na Aruba mester keda cu focus riba nos pan di cada dia, nos entrada principal cu ta turismo. AWOR ta ora pa tur organizacion UNI y haci esfuerzo maximo pa hiba nos producto turismo riba un nivel mas alto. Pa colmo tin

personanan cu ta pretende cu Aruba no tin Monumento siendo cu tin masha hopi y nan mester di proteccion mas cu nunca. Un edificio mas di 100 aña, hasta menos, ya ta un monumento pa nos historia y nos mester aprecia esaki sin importa cual tabata e uso of ken a construye, esey ta historia. A bira tempo pa pasa e ley di proteccion di monumentonan cu ainda no ta existi. Tur otro pais rond mundo ta haci monumento lugarnan publico (no oficina) pa TUR hende bishita y disfruta di historia. Tur pais rond mundo ta usa monumentonan (den combinacion cu arquitectura

modero) pa expone museonan. A bira tempo pa na Aruba nos pone mas atencion ariba e relacion cu un cos tin cu otro. A bira tempo pa nos traha cu vision pa futuro pero no politicamente sino berdaderamente. Como ultimo Desiree Croes kier expresa un biaha mas publicamente su deseo pa ricibi un edificio monumento pa:

'MUSEO ANTIGÜEDAD ARUBA'

Anto imaginabo den centro di ciudad un monumento cu tur articulo, obheto y mueble di un Aruba remoto. Ban muestra cu nos tin Clase y Vision.